

PIDA PIDA COS RIBA E "HAPPY ISLAND" MAS RICO NA MUNDO

Dia 26 di e luna aki nos lo tin otro demostracion contra Gobierno. Esaki aparentemente pasobra lo no a cumpli cu e ultimatum cu a vence e siman aki.

Aruba a bira awor manera Merca contra Saddam Hussein.

E prome atake grandi a tuma lugar, y esaki no a duna resultado, pues, laga purba cu un di dos atake.

Tur cos a keda mescos te cu a menaza cu e di tres atake, y ainda cos ta mescos.

Si mira bon, a pesar cu segun e organizadorman, no a cumpli cu e manifesto y cu e fecha di ultimatum, tin cambianan cu ta ser vislumbra pa mehoracion di e situacion, si mira e conferencia riba presupuesto, cambianan relaciona cu celular y plannan cu a wordo anuncia.

Por a warda poco mas pa mira kico ta pasando prome cu a organiza un di dos manifestacion mes ora asina.

Locual si no a tende di dje, ta mehoracion di e servicio di recoleccion di sushi.

PRIVATIZACION DI SERLIMAR TA KEDA CU HOLO

E recoleccion di sushi si ta birando algo cu tin un holo straño cune.

Den diferente bario tin kehonan cu sushinan no ta ser recohi, y hasta a lanta diripiente asina yama "servicionan di piki sushi", cobrando placa.

Esun planea pa duna cierto compania hulandes y pa cobra mas di 30 florin pa luna, ta hola manera e barinan cu cuminda putri den nan.

Den cercania di DIARIO mes, den Schotlandstraat tin habitantenan ta sclama pa sushi wordo recogí.

Tin cas caminda un luna caba nan no a mira truck di sushi y tin particular cu ta cobra habitante 20 florin pa recoge sushi.

E asunto di privatizacion parce ta bira algo sistemáticamente prepara.

No piki sushi; bin cu keho cu no tin suficiente truck; bin cu keho cu tin trucknan dañá; bin cu keho cu gastonan a bira demasiado; bin cu keho cu tin hopi empleado ta bira malo, etc., pa despues bisa: **Awor si ta basta! Mester privatiza!**

KENDE LO SALI NA DEFENSA DI "NOS PADU"

Ayerá mi a scucha **ABO SO** pero no di **PADU** pero di un cabaretista hulandes. Mi a rabia ora mi a tendecu ta cancion di e cabaretista aki.

E artista hulandes, a dicidi di "**horta**" e composicion di Padu del Caribe, "**ABO SO**", si ta verdad locual mi a tende, esta cu el a graba esaki na Hulanda cu su propio palabranan na Hulandes, y ademas pone riba dje cu e composicion ta **DI DJE**.

Mi a bin haya sa tambe cu aki na Aruba nos departamento di propiedad intelectual ta na altura di e caso aki, y cu ta trata di haci algo riba dje.

Na mi opinion, aki ta **GOBIERNO** mester cay aden, pasobra aki e artista lo a mishi y horta algo cu ta parti di patrimonio di nos cultura, y di nos compositor di mas grandi y mas stima.

Aki no mester ni pensa cu ta trata di e cabaretista mas grandi di

Hulanda, cu ta trata di un hulandes cu fama na Hulanda, ni maske el a biba na Aruba algun aña.

Aki no mester tin miedo di ningun gobernante hulandes tampoco cu lo kier pone man riba cabez di "**nan idolo**".

Den e caso aki manera mi a tende ayera, pa mi, ta ladronicia lo a tuma lugar y e cabaretista aki tin suficiente miyones di florin cu e por paga un daño di por lo menos un miyon pa e asunto aki.

Mester pone man riba dje pa **LADRONICIA**.

SI NO TIN RESPET PA BO MES YIU.....

E kehonan cu mi a haya varios di nan e dianan aki tabata di mamanan cu ta "**bandona**" nan yiunan, pa "**papi**" di afo.

Un di e casonan ta di un mama cu a dicidi di biba cu su "**papi**" colombiano, y tin di un "**papi**" arubiano mescos.

Den e prome caso, pa colmo papi no ta traha tampoco, pero mami a dicidi di trece papi den cas, y awor ta papi ta manda riba mami y riba yiunan di mami.

Mami mes ta tuma tur cos di papi na su amen, y ta trata su propio yiunan manera papi ta trata nan, esta como **CATIBO**.

Si papi no tin placa, e ta pone man riba e yiunan cu si por tin placa, pa e kita esaki di nan.

A bira cu tur cos den cas no ta di mami ni di yiunan mas, pero ta di papi.

Den otro caso **SIMILAR**, dos yiu a dicidi di bandona cas, y ta conocirnan cu conoce nan situacion, a dicidi di duna nan un lugar pa nan por drumi pasobra den cas di nan mama mes, nan no ta bon bini desde cu "**papito**" a drenta, pasobra "**mami no por bay contra papi**".

Si bo ta mama y ta mira con bo "**papi**" ta trata bo yiunan, y cu felicidad di bo yiunan a cambia den tristeza, bo no por spera cu e yiunan aki lo por tin respet pa bo mas.

Den casonan asina bo no ta pone bo yiunan un banda pa un homber cu ta abusa di e posicion cu el a haya su mes aden y ta maltrata bo yiunan y **BO DILANTI** ni cuanto bo ta **STIMA** e homber cu ta varion aña mas hoben cu bo.

E mamanan aki ta lubida cu **MAÑAN** papia ta haya un mas hoben cune y ta bai ora e logra su meta...

Den e di tres caso ta trata di un homber cu a trece su "**mami**" den cas despues cu su casa a bandone.

Pero kico nos ta haya? Aki ta "**mami**" ta manda riba "**papi**" y riba e dos yiu muhernan menor di edad tambe.

Nada e muchanan no por haci mas sin cu nan ta wordo zundra of haya sla, y "**papi**" ta tuma parti pa su "**mami**" tambe y a bira un tirano den cas.

Aki tambe bo ta puntra, ta unda respet pa bo yiunan a keda?

Ta spera bo ta spera pa bo yiunan coi caya?

Si esaki pasa, cu kico lo bo trata na hustifica esaki? Tirando culpa riba e criaturanan?

Juby

TURISTANAN CONTENTO CU NAN PREMIO NA SEAPORT CASINO



ORANJESTAD(AAN): -- Seaport Casino ta duna hopi placa semper y ta spera bishita di un y tur pronto.

Ganadornan di e ultimo tempo ta señora Marie Spinelli di New York y

kedando na Sonesta Suites, señor Calvin Kirsch di New York y señora Gina Patty di Ohio, tambe huesped di Sonesta Suites.

Fotonan: e ganadornan cu hostnan di Seaport Casino.

